

Penuntut kerja *part-time*, keperluan atau tuntutan?

KERJA separuh masa mahupun sambilan bukanlah asing bagi penuntut pengajian tinggi awam mahupun swasta pada masa kini. Tidak kiralah baiki motosikal, komputer, berniaga di pasar malam, bekerja di restoran makanan segera, menjadi guru tuisyen atau apa sahaja, asalkan 'masyuk'. Di mana ada kemahuan di situ ada jalan, usaha tangga kejayaan.

Memang sudah sedia maklum setiap pelajar akan menerima sama ada biasiswa JPA, PTPTN atau pun 'PaMa', namun itu sebenarnya tidak mencukupi memandangkan keadaan ekonomi semasa yang tidak menentu. Jadi, mereka mengambil inisiatif mencari pekerjaan sampingan hujung minggu bagi menampung kehidupan seharian di kolej kediaman.

Yuran pengajian setiap semester bagi IPTA (Institut Pengajian Tinggi Awam) sahaja dalam lingkungan RM1000, dan pembiayaan yang diberikan hanyalah 10% sehingga 30% saja daripada yuran pengajian. Ini tidak termasuk perbelanjaan tambahan dalam subjek seperti kos percetakan, kerja lapangan dan sebagainya.

Pelajar juga dapat mengisi masa lapang dengan aktiviti yang berfaedah dan mengurangkan budaya lepak dalam

kalangan mahasiswa. Masa inilah yang seharusnya digunakan mencari duit poket sendiri sementelahan kebanyakan siswa-sisi abad ini membawa kenderaan masing-masing ke kolej.

Pembahagian antara masa belajar dan kerja sambilan dapat melatih diri pelajar menjadi graduan yang berdisiplin - pengurusan masa antara bekerja dan belajar.

Di samping itu, siswa dan siswi dapat mengasah kemahiran amali seperti kemahiran berkomunikasi antara majikan, sesama pekerja, di tempat kerja dan paling penting adalah dengan pelanggan itu sendiri. Penguasaan Bahasa Inggeris yang baik misalnya adalah satu aspek penting yang perlu ada dalam setiap pelajar.

Ini sebagai satu kelebihan pelajar supaya tidak kekok berdepan dengan pelanggan atau pengedar stok daripada luar negara sebelum menempuh ke alam pekerjaan yang sebenar. Jadi, tempoh masa bekerja ialah waktu latihan secara tidak langsung yang patut diambil pelajar bagi memperbaiki kelemahan bertutur dalam Bahasa Inggeris.

Ia juga boleh meluaskan jaringan hubungan pelajar dengan industri. Misalannya, pelajar didedahkan dengan

tokoh-tokoh mahupun orang yang berpengaruh dalam industri pilihan kelak. Ini membolehkan pelajar lebih berani dan berkeyakinan apabila berhadapan dengan orang kenamaan.

Proses pencarian kerja semasa melangkah masuk ke dalam industri menjadi mudah apabila mempunyai kenalan yang ramai dalam sesuatu industri tersebut.

Tambahan lagi, dunia pekerjaan sekarang memerlukan tenaga kerja yang mempunyai setahun atau dua tahun pengalaman bekerja supaya tidak timbul masalah kecelaruan arahan daripada pihak atasan.

Umumnya sewaktu pembelajaran, apa yang dipelajari di universiti adalah lebih kepada teori. Jadi apabila pelajar didedahkan dengan dunia sebenar, akan mudah menyesuaikan diri dan tidak kekok dalam keadaan sekeliling sekali gus membantu proses kerja dapat dilakukan dengan segera.

Namun, setiap pekerjaan yang dilakukan pasti ada baik dan buruknya. Kerja separuh masa ini juga turut memberi impak negatif terhadap pelajar. Hal ini mungkin akan mengabaikan tanggungjawab sebagai pelajar. Bimbang, apabila terlalu sibuk sana sini mengejar wang, kelas, nota,

tugasan, kuiz dan peperiksaan dikedepikan. Kehadiran ke kuliah juga mungkin terjejas.

Masa itu emas. Pelajar sepatutnya perlu mempunyai persediaan mental dan fizikal yang tinggi sebelum membuat keputusan untuk bekerja sambilan.

Sekiranya pelajar mempunyai masalah pengurusan masa, seeloknya mempertimbangkan dahulu sebelum memutuskan untuk membuat kerja *part-time* ini seperti mengukur baju di badan sendiri.

Sebagai bakal graduan, tidak salah mempersiapkan diri dengan kemahiran-kemahiran secukupnya, tetapi pelajar perlu sedar akan kemampuan serta kekuatan dan kekurangan diri dalam mengimbangi antara belajar dan bekerja. Bak kata pepatah orang tua-tua; *masa itu emas, dan hidup ini hanya sekali*. Jadi buatlah yang terbaik supaya tidak menyesal di kemudian hari seperti perumpamaan sebelum nasi menjadi bubur. Sesal dahulu pendapatan sesal kemudian tidak berguna lagi. Minta pendapat dan pandangan keluarga mengenai tujuan untuk bekerja sambilan supaya mereka tidak risau akan keselamatan anaknya yang jauh di mata.

FATEN NABILA SULAIMAN
Universiti Putra Malaysia (UPM)